

Kerwezeitung

2., 3. u. 4. September 1967

Sommer:
Baden gut



Verlag: Turnhalle Crumstadt
Herausgeber: Die Kerweborsch

K E R W E R E D D

Genomend er Leit, genomend Genosse
schun wirrer is e Jahr verflosse
e groß Fest soll in Crumscht jetzt steije
kooner derf im Bett mehr leije.

Jed Jahr strengt mer o unser Sinne
um e Kerweredd mit Ofong un Schluß zu finne,
dies Jahr hatte mer veel zu wuhle
drum fong ich glei o moi Redd zu erzähle

Der Fußballstar.

Er Leit, er es Widder do,
de Hoiner ,mit eem fonge ma o,
ohne ihn kann die Kerb net laafe,
drum dummern zum Owerkerwenickel daafe.
Jedoch net nur do is de Hoiner gut bewandert,
ach im Sport es er besonders gut veronkert.
Beim Hondball, wie werds onnerst soi,
wor er bei de olde Herrn mit droi.

Un oft durrer do drinn ach sitze,
feel drinke un kräftig schwitze
won er soi Osichte muß vertrete
beim schwetze durrer sich nie verspäte.

En Fanatiker derf mer en Hoiner nett nenne
wer es zu em segt der dut en verkenne.
Fum Fußball versteht er aach sehr veel
so versoint er ach ko Ländersiel.
Do sitzt er vorm Fernseh un dut laut kreische
in Gedanke dem Schiri die Birn erweische
drum liegt aach tief in soiner Seele
omohl ~~ax~~ in de Nationalelf zu speele.

Hoimlich dutt er schon dofür tränieren
sämtliche Tricks un Fouls ausprobieren
deshalb vertreibt er sich immer soi Zeit
zu zeische soi Kunst bei Gelegenheit.

Do sieht er letzt soi Buwe ganz munter
wie se Fußball speele de Hof ruff un runner
er stellt sich dezu un sieht sich des o
off omohl do juckts en in soine Bo
er denkt jetzt bring ichs dene Buwe bei
un sterzt sich in des Getimmel enoi.

De Hoiner speelt seelich wie en junge Gott
un wie er offemohl so e richtisch Tempo druff hot
do kimmt e gefährlich Flanke von rechts,
de Hoiner rennt schnell un krächts.
er dut mit em Fuß gejes Leder wetze
un sofort sich stöhnend setze.

Er Buwe was hedder donn jetzt gemocht
er het mich jo umm e Vermeje gebrocht,
moi goldich Boche, jetzt isses dohin
jetzt bin ich nie in de Nationalelf drin.
Es selwe wie de Uwe is de Hoiner
Fußball speele jedoch kann nur oiner.
De Hoiner get besser zum Handball zurick
do brauch er dann Stecke un ko Krick
wenn er am Stammtisch will gewe soin Kommentar
un dehom word sehnsüchtig soi Fraa.

Drum Hoiner loß des Fußball speele
ich will noch schnell moi Kehl mol ehle
un die Musik speelt fer dich gonz aloo

Heinerle, was machst du da.

Das Fensterln

Des Party-Feiern es immer noch modern
aach de Willi hot des gern
so hot ers letzt donn glei vollbracht
un hot bei sich e Party gemocht.

De Karl der gute Monn
der twistet was er kann
der Elektrik-Hoiner der schwingt soi Bo
un de Schimmelreiter wor natierlich ach do

Un wies bei denne Leit so es
die mache holt veel Späß
wie donn beim Willi Polizeistunn wor
do worn die Dome undie Herrn alle gor

Un weils so schee war lustig und heiter
feiern se holt ofem Sportplatz weiter
jeder kriegt en Stuhl of de Buckel geklämmt
so soinse off de Sportplatz getremt

Do sitzese donn in fröhlicher Runde
im Mondschein zu ganz später Stunde
de Hoiner der gute Stromverwalter
sucht offomohl de Flutlichtschalter
donn er segt wo es donn moi Fraa
un de Wille es ach net mer daa

Der Hoiner wor holt sehr bonge
doch sei Fraa wor schon homgegonge
un der Willi als alter Kavalier
wollt ihr helfe in ihr Quartier

Der Hoiner hot nemlich die Schlissel fum Haus
un soi Fraa kann jo net bleiwe draus
so tut der Willi soi gröst Laater holle
um soine Nachbarin helfe zu wolle

Die Laater stellt er on de Balkon donn o
em Hoiner soi Fraa hebt donn die Bo
un krawwelt behende die Sprosse enoff
de Willi guckt unne un basst off

Doch zu der selwe Zeit kimmt grod fun Golle
de Jürgen un will die Polizei schon holle
er geht doch awwer erst mol selwer hie
un denkt den Oibrecher zwing ich in die Knie

Er krepelt sich die Ärmel hoch
helt feste aus zum erste Schloch
in soine Faust Dynamit des hatter
do sieht er "Ei des es jo moin Vatter"

Entschuldigung segt er ich hob net gewist
daß du jetzt grod beim Fensterl bist
ich hob net gewußt daß du nochts gehst noch fische
no ja loß dich bloß net fun de Modder erwische

Un wie er so rumguckt do kumme se her
die onnern fum Sportplatz die Stiehl howese quer
singend un tanzend so eses gegonge
bis beim Willi on de Laate se hon gestone

Fun seine Fraa sieht de Hoiner nur noch die Bo
so schickt er sich donn ach glei singend o
schnell die Laater enoff zu steije
um mit de Irmgard im Bettche zu leije

So hat die Party donn ihr End gefunne
die onnern sin noch all homgesunge
un die Musik speelt do om Boom
heit gehn mer widder gornetme hom.

Die Heddi un die weiße Mais

Die Heddi in de Kaiserstroß
hot e Tochter e lieb un nett Oos
die wor letscht Johr on Goller Kerb
in Darmstadt off ner foine Reb

Jedoch zu später Stund fährt leider kein Bus
sodaß die Renate mit dem Zug bis Golle muß
un dort mußte sie dann die Mutti holle
drum fuhr die mit dem Fohrod fun Crumscht noch Golle

Doch daß die Heddi werd unnerwegs net gemadelt
es es Junge Lieselottche mitgeradelt
die drei Dome wollte donn
mit zwa Fohräder heimwärts fohrn

Sie soche sich des werd schun klappe
un damit ko nuss neweher noch dappe
des Lottche werd off de Gepäckträger geschnallt
so gings dorch die Schloglecher, des hot vielleicht geknallt

Sie hatte ungefähr en Kilemeter hinner sich gebracht
do hot newer ihne e Polizeiauto haltgemacht
un sofort steigt ach schun ohner aus
die Renate kreischt "Uje e weiß Maus"

Zack, zack worn se all fun de Räder hunne
so schnell worn die Mädcher noch nie gesprunge
un jetzt werd gewedelt un gefächelt
scheene Aache gemoocht un gelächelt
jo daß ehne nix bassiert
un die Polizei ko fünf Mark kassiert

Mit veel Worte dun se die Männer betörn
un zu guter letzt noch schwörn
daß se nun wolle laafe hoom
bis noch Crumscht fun Boom zu Boom

So gawe sich die Poliziste erst emol zufriede
un die holde Weiblicheite fonge o zu schiewe
doch man sah vom Polizeiauto nur noch Rücklichter blitze
do dun die drei schun widder im Sattel sitze

Die weiße Mais hatte sich doch sowas gedenkt
un howe er Auto widder rumgelenkt
sie treffe die drei gonz schee und gemitlich
wie se radle durch die Nacht gonz friedlich

Die Heddi wollt noch schnell er Tochter warne
un indem se es Licht ausmacht ach noch tarne
doch jetzt halfe alle Tricks un es Lächle nix me
jetzt mußte se zahle, eraus mit dem Portmanee

So mußte se donn doch noch Federn losse
donn mit de Polizei do dreibt mer ko Bosse
hoom sin se gelaafe und nicht gefahren
und die Musek spielt wer soll das bezahlen.

Es Schattkabinett

Es gibt, er Leit, damit ers wißt,
in Crumscht en Club, des es kon Mist,
in Keglerkreise lengscht bekonnt
werd er mim Fachausdruck benonnt.
Als Crumschta Schattkabinett,
es honnelt sich um ko Balett,
doch sin bekonnte Gesichter debei.
De Heuner do newe, ei, ei, ei,
de Heuner natierlich ach vun do driwwe,
de Tornhallwert un die Scheichedinne.
Un wos noch alles versammelt is,
sie stande vor korzem vorm Kompromiß.
De Benne er Mugg, sie hat geworfe,
korz vorm Obend so dreizeh schnorre
schmächtige Seischa, de Club wollts net glawe,
so sinnse nochts ach noch hie gelave.
Bier un Schnaps, Napoleon die Marke,
gonz besonnners fa dorschtiche Starke,
wor alles debei fa Mondscheinparty,
im Benn seum Saistall mit Ultralaity.
Do honnse ach noch korzer Hond
e Ferkel kaft, wos gewiß ko Schond.
Vier Woche speter, beim Elektro Heuner
Spoferkel esse, im Club werds als feuner.
Der Gedonke wor noch net ausgesproche,
do hat de Wert ach schon Lunte geroche.
Er nimmt die Flasch Schnaps un lestse lafe,
jetzt misse ma des Ferkelsche dafe.
Napoleon, Napoleon, so hast unsern Schnaps,
do hot des Ferkel drin rum schon gedapscht.
Un wies do so leit un wies do so liegt,
hats schon de richtiche Nome gekriegt.
Doch eh dasses kimmt zu de Mari-~~oa~~-Tuonett,
worn die Geschwister nur noch e Skelett.
Die hann den Schnaps jo gornet vertroche
un sin donn nochenonner eugeschlofe.
Zu der Zeit hat der Benn jo Pech,
zwölf vun denne dreizeh worn schon wech.
Des große Geschäft wor aus un vorbei,
Doch de Benn bringts gonz schlau inderei.

Als vier Woche speter des Kabinett
will holle des Seische mit Wache un Brett,
do mont der Benn, jetzt horcht mol her,
des Seische brauch on Fett noch mehr.
So harrers nausgeschowe bis zuletscht,
sie donn endlich hann die Messer gewetzt,
un bringe des Seische uff die Woch,
do denke die onnern erst richtich mol noch.
Es muß jo uffnemme, er glabt mas net,
selbst des reiche Kabinett,
uff de Volksbonk drei bis vier Kredite,
so hat die Sau on Üwergewicht gelitte.
Als endlich donn beim Heuner wor
mit **Lompingjans** in Hof un Door
des große Fest der Schlochtereie,
hot koner gefehlt, sie worn all debei.
Do hannse noch zu guter letscht,
die Worscht verkocht, es wor on Metsch.
Satt wornse worn donn trotzdem noch all,
wo doch die Sau vier Zentner prall.
Doch duts dem Club jo heit noch laad,
han so long fa die Sau gespart.
Zu guter letzt hanse donn doch
Schulde fa Schulde, noch un noch.
Ich was net obs stimmt, ich hats so gehert,
de Benn kriegts heit noch offs Brot geschmert,
als het doch unser Kabinett,
die Rechnung mit dem noch net komplett.
Bezahle die Rate schun Woch fa Woch
un die Kass hot kriegt e gonz schee Loch.
Zum Nochdenke hat ich mer Zeit genumme
un bin zu dem folgende Schluß gekumme:
Un die Moral vun der Geschicht,
wer einmal will un hat noch nicht,
vun Benn e Spoferkel gekricht,
den hats noch gornet schlimm erwischt!

Die "dritt" Kercheuhr.

So monch Heisje werd renoviert
aach die Kerch werd restauriert
die Hondwerker misse soi schwindelfrei
damit der Turm werd schee un nei

Do woor for poor Woche e klo Stürmche
mon hot schun gefercht um des Kerchetürmche
un richtig do kimmt er ach schun gelaafe
de Heinrich un will e nei Kercheuhr kaafe

Er rennt zum Schlosser segt fast ko Wort
bloß ons, Hons die dritt Kercheuhr es fort
de Hons denkt sich a net feel debei
un segt die schweiße mer klei widder enoi

Er flitzt on die Kerch un sucht die Uhr
der werd sich wunnern, des gibt e Kur
er sucht, des Biest muß doch do leije
die kann doch net allo de Torm enoff steije

Er geht offs Rothaus un zu de Sofie
un donn in de Kinnergatte hie
dutt iwwerall genaa free
ob se die Uhr net hon gese

Er scheicht die Kinnergärtnerinne im Schulhof erum
die Leit bleiwe steh un gucke gonz dumm
wos macht Ihr donn, was is donn bassiert
Ei die dritt Kercheuhr es heit explodiert

Off omohl werds dem Hons zu doof
er klettert donn den Torm enoff
Sietz un lächelt gonz verdächtich
lacht gonz laut un verächtlich

Glei droff steht er wirra beim Hoinrich do
donn denn geht die Sach om meiste o
do stehn se donn die zwa Herrn
un fasse alle beed on ihr Knerrn

Daß uns sowos es passiert
daß mer des jo koner erfiert
so segts der Hoinrich zum Hons
donn die Kercheuhrn worn all noch gonz

Mer honn gelacht un wißt er aach wieso
donn statts drei gibts iwwerhapt blos zwo
on dem Tirmche worn nur poor Bretter fort
e dritt Uhr gabs nie on dem Ort

Un die Musik spielt, daß es denne zwa net werd so lasch
en gonz kräftiche un schwungvolle Masch.

Der Schweinehirt

Er lieve Leit er wissts jo all
es gibt ko Männcher me im Fasselstall
un soll so e Vieh doch Nachwuchs krieje
do missese holt zum Hille Schorsch zieje

So hot in de Mittelstroß de Karl
e schee fett Sau in soim Stall
die wollt er donn aach decke losse
er denkt die macht bestimmt ko Bosse

Un wie die donn in er Toge kimmt
do nimmt der Karl die Berscht geschwind
dutt des Seiche butze un berchte
daß sich der Ewwer brauch nett zu ferchte

Er treibt des Dierche zum Door enaus
in die Schulstroß zum Schorsch soim Haus
unnerwegs fängt er o leise zu singe
soi Sau werd em bestimmt veel Junge bringe

So treibt er se donn beim Schorsch zum Door enoi
die Sau schnüffelt schun; wo werd de Ewwer soi
des Dier steht do off zitternte Zehe
wie de Ewwer kimmt aus soim Stall gestehe

Der Karl dutt schmunzle no hoffentlich klappts
der Ewwer geht dron mit lautem Geschmatz
die Sau kriegt Ongst sie rennt defoo
de Ewwer immer feste kinnetro

Die wilde Jagd geht dorch de Hof
um die Roll erum die Meschkaut enoff
de Karl un de Schorsch dun hinnerher flitze
un bestimmt mer wie die Seicher schwitze

Off de Meschkaut bibts der Ewwer off
er kimmt doch net off die Sau enoff
de Karl der wollt doch Nachwuchs zieje
do dunn se die Sau on de Ohrn jetzt krieje

Des Dier muß doch do stehbleiwe jetzt
fun de Meschkaut kimmt de Ewwer gewetzt
er rennt dewedder wie en Stier
die Sau wollt fort doch de Karl helt se hier
er segt sich des hot jo doch noch geklappt
un es mit de Sau widder hoom gedappt

De nächste mojud der pflichtbewuste Karl
geht naus in soim schene Schwoinestall
er will soi trächtich Seiche fittern
des fängt for Schreck schun o zu Zittern
un denkt wer kimmt donn do eroi
des werd doch net de Ewwer soi

Die Sau leit ofomohl gonz platt
weil se nemlich en Dormdorch~~h~~bruch hat
so doll hats der Ewwer gemacht
daß de Karl hot soi Sau in Not geschlacht

Sie hot jo net fun sich aus gewollt
de Karl hot gesogt daß die Sau sollt
so laßt den Tieren ihren Lauf
und zwingt ihnen nicht die Freude auf
un die Musik spielt noch rasch
fer die Sau en kloone Trauermarsch.

Helmut, der Flieger

In Crumscht gibts Leit veel kunterbunt
net schlonk un ach net kugelrunḡ
heit in denne gute Zeite
die wisse alle Neijichkeite
daß de Hoiner es de Fußballstar
wo de Willi mit de Irmgard war
fum Karl dem gute Schweinehalter
des wisse de Helmut un de Walter

Do wor letzt gonz in Eschollbrückens Nähe
e Stickche Wiss fun de Gemeinde obzumähe
de Philip ruft de Helmut zur Stelle
daß der die Sache kann bestelle

de Helmut orra wors vielleicht de Walter
drückt donn kräftig off de Bulldogschalter
un ach de Philip fährt noch mit
do soin die zwa donn superfit

So gehts enaus ons Pappelstick
heit es schee Wetter heit hommer Glick
sofort fengs Helmutle o zu mähe
dutt feste on dem Lenker drehe
de Philip der es hinnenoch gedappt
un hot geguckt obs richtig klappt
so hatte se schon e poor Runde gefohrn
wie se donn gonz dicht on de Papele worn

De Helmut un de Philip es klappt wie om Schnirche
in Gedonke soin se schon beim nechste Bierche
off omohl duts en laute Knall
un schneller wie de Schall
saust der Helmut in die Lüfte
in der Astgawwel hengt er mit soine schmole Hüfte
er zappelt un strompelt un kreischt gonz laut
holt mich runner sunst trauert moi Braut

Der Philip guckt sich des erst emohl o
er sieht fun dem Helmut nur noch die Bo
der Schlepper wor halb umgekippt
mit de Vorderrärra in e Loch gehippt
offomohl herts de Philip schnaufe
de Helmut dutt grie o schon laufe
Philip helf mer doch erunner
sunst gibts bei mir noch groß Gedunner

Longsom kimmt er fum Boimsche geklettert
koum unne hot er schon e Liedche geschmettert
des so typisch fer ihn wor
horcht zu die Musik spielt jetzt for:

"In dem Baume sitzt ein Vogel, singt als wärs ne Nachtigall!"

Die Badewanze

De Eschon der is stadtbekannt
weil er so hübsch un so galant
so hatte sich jüngst zugetrahe
dass er off en Geburtstag wor oigeloch
bei soim Kusseng is dess Fest gefalle
drum er sich soim Staat sich schnalle
en Kaste Praline unnerm Orm geklamm
so hotter soim Weg off de Sond gelenkt

Um acht begann dann alles zu saufe
der Volker fängt o Ex zu saufe
Trotzt Warnung treibs net so doll
war der um noi Uhr stinkbesoffevoll

Nachdem er hat noch kräftig gelacht
homern um zehe nach hause gebracht

Der Eschon hat bis elf nur Zeit
auzutowe soi ganz Heiterkeit
er hott den Woi blos laafe losse
un donn gestreckt soi große Flosse

Hoom wollte hoher donn gesunge
doch er hott des Toor net gefunne
statt on die Hausteer zu flitze
durra offomol unnerm Speicher sitze
unn glei droff leit der Kerl o Graus
mette im Gong funn dem große Haus

Er streckt soi Fieß bis on die Wond
dass kooner mer e vorbeikumme fand
so dutt der Kerl im Gong do leije
un die Greta die muss iwern steije.

So kann des je net weitergeh
mer dunn donn all zusomme steh
un dunn en Plon entwerfe
ob mer dess ocher dess mit dem mache derfe
zum Schluß wor dönn ohner so gewieft
der Eschon werd in die Bodewonn gehieft.

~~Jetzt werd kräftig in die Hännp gespuckt~~

Jetzt werd kräftig in die Hännp gespuckt
un donn on alle vier Enn ogeruckt
der Teppich rutscht, die Bretter krache
de Eschon dutt paar Soifzer mache
so esses donn ach bold gelunge
de Eschon es newer die Bodewonn geschwunge

De Werner Gessi kann des quassele net losse
er schätzt un trift nach alle Seite mose
wie schwer un wieviel Kottlet mer kennt esse
so dut de Gessi donn den Umfong messe
von Ihm begutachtet un gewohe
werd de Egon in die Bodewonn gehowe

Soweit hatte mers jetzt gepackt
doch glei droff steijt de nächste Akt
die Klamotte wern em obgestreift
de Egon werd sche oigeseift
un dann mich afft die Laus
kimmts Wasser aus de Bodebraus
de Egon prustet schnauft un spuckt
un weil er sich net richtig duckt
haut er mim Knorn an Boiler dro
mer sietz noch hait gehts aich nur o.

Hoom will ich kreischt er laut
un steht mim Unnerhesje uff de Haut
om Door un will schon driwer springe
mer dunn en donn grad noch zwinge
Hoos un Hemm sich ozuziehe
de Gessi dut schon widder wieje
die Schubkarn hält glei ebei
de Egon der sollt jetzt do enoi

Er wehrt sich jedoch soiner Haut
"Ich bring on um" so kriecht er laut
marschirt donn stracks die Stroß enoff
dehoom enoi un tief in Schloß

De nächste Tog: er sucht soi Hose
die Strimp hat er a irgendwo gelosse
doch Egon eins das glaube mir diese Verse
geschahen nur aus lauter Liebe zu dir
Die Musik spielt Ach Egon ach Egon.

S c h l u ß

Dos wors er Leit doch ich will hoffe
daß denjenige den moi Vers betroffe
mir net glei Blutrache schwört
weil im ess e Malerche pasiirt
mer dunn die Sache meistens entschaffe
weil mer net alles bringe derfe.

er werds net glawe mer henn aa unser soie
hait hommer nach Kerweborsch, doch wie werds moje?
die Tradition des große Wort
es sehr weit fun uns fort
die Kerweborsch wern do he gestellt
als wärns die schlimmste Brider off de Welt

doch die Zeit es net geschaffe
für Schlechtigkeite wies oft passiirt
des merkt eich gut aach unner Affe
werd nur de eichne Monn pussiirt

Off die Kerb soll sich jeder freue
unn dehoom losse all soi Soie
vergesse dass alltägliche Leit
un kumme mit Frohsinn und Heiterkeit
wenn jeder wollt em onnern helfe un net
gar so in beherscher so in
net heile mit em Rudel Wölfe
sondern Mensch zum Menschen sein

Mer sinn doch alles Leit die schaffe misse
mit Bleistift, Hammer oder Pflug
un sei des Lewe aach noch so beschisse
an Freuden bietet es doch noch genug

Denn jeder der das Leben meistert
den hatt ein Recht auf fröhlich sein
und wen die Kerb echt begeistert
den nehm ich auf in unsern Reihn

Drei volle Tog feiern mit jetzt
denn unser Wert hott sich bestens gericht
de Sool werd immer voll besetzt
un feiern dummer bis de Tog obricht

nun will ich offhern mit moiner Redd
un unser Musik spielt noch rasch
e vielleicht mancher heimwärts geht
de traditionelle Kerwemarsch.